

張文定公環碧堂集

張文定公環碧堂集卷之七

傳七首

先祖東臯府君傳

府君諱懌字汝誠別號東臯張姓世爲鄞人生八歲我
曾祖一齋先生卽世鞠于我高曾祖母王氏幼有異性
好讀書坐閣上每竟日不下出入舉止端重英特宗間
咸器異之稍長親知或規以貲厚力單宜漸歷家務則
益砥礪嘗因事冒雨徒跣入城市不爲迂腐者然書
冊卒未嘗去手至臨殮不廢天順己卯遭回祿時方弱
冠經營堂構恢復先業裕如也長髯偉貌衣冠肅然間

恣區賒課先期輒辦覈戶口履畝稅釐革蠹獎錙銖不遺歲旱率里閭禱祠山川澍雨大降我叔祖以部運卒于南京悲憂成疾與人言輒流涕每遇祭祀必齋沐夙興惕然如在脫毫末不至則缺焉如不能爲情市價之登耗鄉閭之豐約終身不言雖或告之不應與黨人分田聽其大界界越數武終不爲較也里中人盜穀空其困或廉得之以告府君曰吾未嘗有所亡也揖而去之明於幽明之故鬼恠誕妄之說一無所惑越俗遭喪用術士蓋棺必令舉家出次于外謂之避帥不則有鬼物掊擊之或病或死率有應驗府君治喪黜之至今吾鄉

俗無避帥之擾孝子慈孫得以致慎終之誠自府君始也高嚴簡潔為詩文清穆溫潤而高下短長之際和調融暢誦之有遺音焉平生焯然自信不求人知發言制事苟少戾汰度雖儒先生介然不為之應時所傳詞賦之屬苟不逮古昔雖名鉅卿未或得其一許可也惟所知時至則與之談論古今酣觴賦詩往往竟日或至夜分終無倦意然平生亦不過三數人舍是無當意者年四十五卒所著有東臯集若干卷叔父令萍鄉捐俸繡梓以傳吾季父所手錄也始吾叔祖既早世遺孤病甚府君祝曰天平寧殞我一子母令吾弟無嗣已而竟弗

救則命我仲父後之待叔祖母以禮卒完其節邦奇生
不及識吾祖吾祖之德吾父恒朝夕言之而福建叅議
裘本厚先生府君甥也實著行狀邦奇謹據爲傳以示
于後人

吏部尚書致仕進階榮祿大夫整菴羅先生傳
公姓羅氏諱欽順字允升整菴其別號也羅自周末由
長沙徙豫章宋紹興中諱詢者由豫章來主太和簿因
家邑之缺城十世孫鐸中景泰元年鄉試任黟縣學訓
導是爲公大父以公貴贈通議大夫南京吏部右侍郎
子曰粟濟公諱用俊仕爲浙東青田縣學教諭成化改

元歲乙酉十二月辛巳生公于官舍靈秀端靖甫七齡
入學卽循循有規矩稍長常獨處一齋讀書習字未嘗
輕出朋輩或相拉游戲辭不往年十四以歲首改題門
符有云不規規於事爲之末但勉勉於仁義之天見者
歎賞從丁先生榮學端午日面試論語義二篇未午呈
稿丁輒以逮到期公公歸栗齋公令誦所作良色喜無
何聞士美文甫兩曾先生及第以詩寄丁有云吾鄉多
士皆騏驎逐電奔雲不可追驚劣自慚空老大還看綠
耳與纖離益屬望於公已不淺矣弘治己酉領鄉薦第
一明年舉會試奉

廷對賜進士及第授翰林院編修階承事郎

朝退輒閉門讀書乙卯冬十二月公母曾夫人訃聞明年春栗齋公以國子助教乞休公待以歸服期未始出庭戶己未春至京會仲弟欽德季弟欽忠同舉進士遂同居秩滿

勅進階文林郎封栗齋公如公官母曾氏配鄭氏皆贈孺人壬戌同考會試得景陵曾鐸卷遂冠多士時稱知人克

經筵展書官未幾陞南京國子監司業先是起蘭谿章公懋爲祭酒以家難辭

詔推補司業以需遂以命公蓋此負缺而不補垂七十
年矣時監規積弛士多放逸每遇差撥爭論紛如公至
謂放心宜收非管攝之嚴不可爭風宜息非稽考之精
予奪之公不可持此三者甚力始而怨謗交集終亦安
之六館肅如凡所獎進士甚多後皆有名奏疏言下第
舉人當入南監者正宜及時作養顧往往徑自回家虛
糜歲月可惜請立法以拘制之當道雖以爲然猶恐人
情不便不能盡從明年秋八月章公底任事必見咨以
行相處踰年深見信重公得告奉栗齋公歸其鄉因疏
乞終養吏部拘例久不行乃以丁卯冬復任戊辰春將

考滿會逆瑾作威南銓忽用其新例將具公給假還任
始末上奏楚亭劉公時爲太宰謂公奏可緩發宜以考
績先行一面瑾固當無事公謝曰感公厚意但非力所
能愿早爲發奏俾某得供子職爲賜多矣野亭爲邑動
四月得報除名庚午秋八月更化

詔下復公官冬被南雍之

命上獻納愚忠疏疏竟留中壬申夏四月以新例考舊
績將北上抵淮病弗能前疏請告至再尋陞南京太常
寺少卿又以病告弗允先是弘治間嘗有詔錄開國功
臣後鳳陽有郭琥者奏稱滁陽王裔孫遂經營得奉祀

蓋虛衡也頃之又欲比徐揚二王求太祠祭署祠祭署
隸太常張公肯爲卿許爲具奏公曰不可徐揚二王皆
太祖至親滁陽則以義合固難槩視且當時二署之設
以墳今爲琥請何理也琥乃自入奏事下吏部冢宰遂
菴楊公上議并其奉祀削之滁人快焉兩京缺祭酒吏
部首薦公至再皆不果用先輩或用相慰且以拙諷公
賦三絕句曉之其卒章云伊洛淵源世所宗高談性理
半雷同若無上蔡除根力遠隔程門一萬重及再見頗
有慚色乙亥夏五月陞南京吏部右侍郎友人曾元之
自京師以書賀有曰凡遇負缺再推而得之者在他人

人皆曰人也非天也在先生今日人皆曰天也非人也
公亦以元之爲知言秋九月攝南京工部事是月晦會
孺人卒命子珮扶柩歸葬丁丑秋七月奉表入賀萬壽
聖節比至京

駕已西幸旣畢事出郊疏乞歸省遂行沂章江始得報
有

旨給驛無及矣戊寅夏六月還任冬十二月秩滿即日
馳疏乞休沂江西歸至庚辰秋八月得

旨羅學行老成其令仍舊用心供事所辭不允無何
改吏部再疏乞休有

旨不允且速之赴任公猶欲懇請栗齋公曰第往或可
少行其志乃行至則以考滿聞陞授通議大夫贈封二
代及妻室皆如制冬十一月

毅皇駐蹕通州被

旨赴行在所供事尋賜見潞河驛十二月朔旦候

駕漕運廳前

駕至偕文武諸大臣及科道官入見遂劾奏及者請寘
之法有

旨收繫乃稽首而出堂中惟設

御座旨則司禮太監由御屏後傳出初九日暮前行候

駕次日午 駕還宮十一日大祀

天地命分獻北海壇辛巳春三月十有四日入奉

遺詔四月二十二日

今上卽位後數日自陳乞休不允太宰王公瓊被收公攝篆首遵 詔條備考

先朝得罪諸臣列其事狀以請於是

聖恩溥及無間存沒轉左侍郎太宰熊峰石公入掌誥勅乃再攝篆先是會推吏部尚書公力舉白巖喬公至是卒代熊峯比至與九卿上疏議大禮疏草公所具也嘉靖改元壬午春正月充實錄副總裁賜宴禮部三月

駕幸太學充分奠官賜羊酒銀楮都御史席公自湖廣
馳疏請起邃菴楊公總制三邊吏兵二部議如所請公
曰邃菴舊相即起亦必禮辭往返須數月今邊報孔亟
李亞卿方在彼行事利害所繫恐宜三思邃菴由是不
果起公語所親曰邃菴素知予予尊仰之但入京踰年
聞諸物論殊籍籍今所言非惟事體當然亦欲以忠於
知己者爾君子曰公所以報知己者如此真盛德事視
彼阿私所好卒以陷之者其小大厚薄何如也尋陞南
京吏部尚書既抵任聞栗齋公病不解即馳疏乞休便
養得

青卿父既有疾準暫回省視馳驛去病愈亟復任治事
冬十二月抵家明年春三月改禮部尚書夏四月十九
日丁艱丁亥春復起爲禮部辭疏上奉

旨卿學行簡在朕心推舉出乎廷議禮卿缺負虛位以
待宜勉承新命亟來供職再不必辭夏五月改吏部尚
書再疏懇辭奉

旨卿才行素著人望久歸近自陳休致已有

旨勉留如何復有此奏既情詞懇切准致仕有司仍月
給米四石歲撥人夫四名應用已而諫垣諸臣會薦十
人以公爲首忌者大怒遂窮探其故旣無所得猶斥三

人外補公前後被薦不啻十數雖三被斥而薦者猶復不已戊子秋大禮告成

下詔覃恩進階榮祿大夫公糾合族衆改作羅氏宗祠又與仲叔氏協謀市地創作小宗祠以成先志辛卯會同鄉士友議鄉約公自家居越茲十有八年足不履城市惟視季弟西野公病及喪塋壽楊氏女兄七十纔一再出超跡塵表而鍾情民物風致邈悠而接引後學拳拳焉無倦意所著有困知記若干卷皆根極理要足以訂訛砭惑爲來學指南云公今年七十有五予近得見所題手卷字畫精楷不啻少壯又因公子瑒見困知記

已再續益好學之功老而彌篤如此仲弟毅軒公以憲使致仕清嚴絕俗獨處一樓率旬餘一下見公如嚴賓焉公長子琰例援引禮舍人克家次即珥歷官馬湖知府貞脩雅飭有公之風云太史氏曰孟子稱古之人窮則獨善其身達則兼善天下公歷官史局爲太學師進仕少宰革翬競之習嚴若否之辨亦庶乎達且兼善矣然兩推大司成弗用冢宰命下曾弗一日太平仕以教以治固未克竟厥施焉而其天性之貞固造詣之精深克養之完粹進退辭受邁迹高風既足以庶頑立懦而措之言議形之著述又皆平正確實條詭誕而歸之正

續魯鄒河洛之傳以表儀士族者且將無善百世豈獨
天下哉而亦何窮達之能限也中庸曰誠非成已而已
也所以成物也欲求公者必自思誠始矣

都察院右副都御史朱公傳

公諱瑄字廷璧浙江鄞人舉進士授工部主事累遷河
南布政使擢都察院右副都御史總督漕運踰再朞以
疾致仕公謙和謹恪卓有定識默觀世故知興替災祥
皆由人致天之施報遠近遲速萬萬不齊而無不巧中
故所至勵節介凜不可犯仕至三品服不能具朱紫家
居歲歉蔬食或不給晏如也都御史王璟奉命賑饑浙

東遺公百金公拒弗受始公之督漕運也嘗以微疾卧
郵舍謂侍者曰若等有胆聞乎其以語我吏曰里中有
陸氏者奸而橫侵其鄰鄭氏盡其產撤其居以爲己官
室苑囿所餘唯嘉樹一本陸氏晚得子而暗數歲游於
庭忽指樹而言曰樹乎汝猶在邪家人大驚已而復暗
不語百方誘之終不出一聲稍長荒淫戲傲靡所不爲家
罄乃死人曰是鄭氏後身云公曰信乎曰信盡召其里
人問之亦皆曰信後公遇人必以告焉年六十四終於
家

贊曰天有顯道夫人能言之然至臨小利害輒爲動者

莫之能信故也若公非古所謂迪哲者邪然所稱某氏後身云者非真有輪迴如釋氏家說蓋天道好還無往不復人所不報天必償之若陸氏子所言劉充造化之神應非必真後身也而或者謂公爲語恠顧不知其常耳

明贈司禮監太監忠毅雲公傳

公姓雲氏諱奇洪武間以內使守西華門時丞相藍王居第去門不數十武一日詭言其第井中澧泉湧出請上臨觀而選壯士裹甲伏屏帷間以俟舉朝無知者公知之將上變告會

鑿與西出突入衛伏中控馬衙言不可出狀公南粵人
言本侏離而情迫氣憊益不能自達左右皆莫喻其故
上怒命左右捶之將斃猶奮臂指逆賊第

上廼悟登城而視反形畢露遂悉殲之召公公已絕矣
上悼之贈司禮監左少監謚忠毅賜葬地中山武寧王
墓之右春秋遣祭仍給六人以供灑掃凡內臣有沒而
無歸者得祔其間

今天子御宇守備諸公復爲之請于

朝加贈太監賜諭祭焉嘉靖己丑太監呂公實來守備
感其忠義爲文而祭之復表章其事太史氏曰人孰

不死雲公一死而免

萬乘于震驚其手

宗社于生靈于天衷于民彝以其一身翼持于無窮所
謂重於泰山者非耶且其木強之質口不能出一語而
忠義溢發自足以伸其志彼截截善論言邀寵利于厥
躬臨小利害輒斂手避不至於誤人家國不已者聞雲
公之風亦可愧以死矣其塋域歸然祠宇嚴飭與開
國元勳並食百世豈過也哉豈過也哉

明故瑞州府知府宋公傳

公諱以方字義卿別號西溪先本廬陵裔七世祖有諱

賢可者仕元沅州路通判因家黔陽之安江子繼祖入
國朝隸尺籍徙靖州衛生仕良是爲高祖曾祖文勝祖
誠皆不仕父珙贈戶部主事丹周封太安人娶馮封安
人公年十三補州庠弟子員十七領湖廣鄉薦試禮部
兩中乙榜皆弗就弘治十八年舉進士試大理寺政授
南京戶部河南司主事至司攝篆閱後湖圖籍尋權新
河稅立法釐弊有冒禁者置之法時逆瑾用事怙勢求
脫部侍郎欲貴之對曰寧免官歸敢廢法乎諸璫嚙之
以他事按捕胥隸恐不敢徃曰無憂也我得以公道自
之璫竟屈服正德三年丁父憂五年服闋留戶部陝西

司主事尋給餉宣府歸其羨於官歷攝諸司監督部廩兼理鹽法六年榷江州稅至則創置循環曆歸稽於部且揭榜於門刻以定數示無毫髮私江湖千里至今猶傳頌焉七年還京陞福建司員外郎兼總太倉通州京儲度支九年請改官南都以便祿養不允時戶部以邊儲告急尚書思料理須得人特奉

勅清查兩畿積逋十一年陞山東司郎中再奉

勅視事如故十二年出守江西瑞州府瑞古靖也公始下第嘗泊舟鄱陽湖口夜夢一吏持檄授曰帝命汝守靖州應曰吾鄉土也涉嫌請辭吏去復來曰非命汝作

靖州守命汝靖州作城隍也寤不可解者二十年至是
閱郡沿革志乃始知爲靖州而城隍之說幻不可曉占
者謂瑞無城池蓋帝使汝爲創之以保障茲土也然瑞
自華林兵燹後民疲法弛教隳士逸公蚤作夜思勵心
圖理明刑飭政之暇每臨學宮進諸生講論擇年少質
茂者爲延師而教之多所成就是時寧庶人宸濠已弗
靖誘引華林逋寇匿之西山夜肆刼掠公每捕之抵於
法既庶得反狀恐一旦有變郡無城可恃乃以贖金萬
餘兩創甃之崇廣完密儲粟數千石度可爲戰守計瑞
始設民兵僅千人乃復益以募兵三千人日爲訓練以

及可使申嚴保伍之法以潛奪竊發之魄凡濠有事於
瑞而厲乎民者一切峻拒之先是濠以非法中人當道
檄南昌推官會按其事公爲平反按者數諷以禍福斥
曰吾肯殺人以媚人邪益見忤於濠十四年恭令撫鎮
劾公稽命怠事聽就逮問憲檄屢至知不可已乃行郡
之父老遮道留曰寧藩固將以是阱公公柰何舍我去
乎曰

君命也安敢不往封疆之臣死於封疆吾之自許久矣
遂拂衣而往至中途召屬吏手書云云與之若訣焉比
至省時六月十三日也遂下南昌獄明日濠突稱兵反

兵入南昌破獄執之械繫隨行呵令從反應曰吾有死爾制之益固舟至鄱陽湖望康郎山曰吾得死所矣遂奮罵投水而死年四十四或曰城隍之夢至是破矣其孤崇學崇簡聞難奔赴沿江號血求遺骸不得乃歛衣冠齒髮以歸瑞人胡叅議謂公忠烈不可以無表見請於巡按浙江御史唐鳳儀以上其事行江西覈實已而舟師來者言死事甚悉而瑞之郡縣兩學諸生復相繼以爲言湖廣分守叅議王公特大木王送附鶴山魏了翁祠瑞亦奉祠名宦之列嘉靖五年崇學等具疏叩闕下禮官明年巡撫湖廣都御史黃公亦移文江西會

題而巡撫都御史陳公特爲上章請錄遺忠吏部侍郎
孟公按典具題六月二日

命贈公光祿寺卿仍蔭子入監讀書賜祠額大祠江西
歲時致祭典至靖州知州丘君慨以忠節大義當風鄉
閭於是胥地大祠於鶴山之陽嗚呼忠孝天命也若宋
公之事克迪帝命徵夢於彭蠡則又其焯焯然者然人
之效忠身死則亦已矣公死而精靈氣魄固當與瑞之
山河土地胥配於無窮而其英風義槩激於人人凡爲
臣者孰不益固其屏衛之心焉則公奚啻爲瑞之城隍
爾也天之所以命公豈不偉哉

梁節婦傳

梁爲鄞舊族遭元末喪亂漸廢其資業然世有文獻節婦邑之劉氏年二十七喪其夫某輒誓死不移然當是時舅姑旣沒無伯叔之親生子甫再越月乳羸孤嫠形影相吊敗垣之內草屋數椽不蔽風日節婦懼不能全常持刀自衛曰寇至即有死耳先世遺產曾不盈畝劬苦織紉不廢晝夜而饗殮常不繼宗族凋耗莫可恃賴唯西疇先生者方以學行重於鄉閭僅守其先業念節婦困悴則時使人存問往往掄已之養周其乏絕且爲教其子衡衡年十五六學頗有端緒即別授徒以其束

脩爲養然亦微甚恒不充衣食節婦嘗出汲水墮橋下
度不能生忽若有綆懸深水中遂以手緣綆而上比登
岼視之則未始有物也蓋鬼神之護其節云年七十四
以疾卒孫曰寅能世父家學每言其祖母事未嘗不掩
涕云

前史官張邦奇曰余嘗聞節婦之子衡今所稱友蘭先
生者親見其母備歷艱阨垂五十年欲聳於朝而未之
能也會工部侍郎曾公賑饑于吾土爲書千餘言白公
公壯其詞嘉其志下其事于有司有司見其單微竟廢
格不行夫婦人之完節處富勢者猶易而當孤貧者極

難予以節婦事推之則知爲人所極難而見抑于有司不獲霑

朝廷之旌命湮沒不聞者天下豈少哉雖然旌命榮于一時而傳其事足以勸于後世予嘗從史官後知而不書是效尤當時之有司也

陳節婦傳

節婦王氏楚之攸縣人夫曰醫學訓科陳廷璋自京師授職還至武昌病卒節婦哀哭累絕水漿不入口七日時年僅二十二親屬或難其早寡則艷然怒曰吾惟及吾夫偕死爲快耳顧老姑垂白遺孤方在髫髻特用是

恐死朝夕柰何誘人入犬彘耶輒自髡以見志事其姑
彭宜人恒得其歡心誨其子誥論嚴且有法敬慎勤約
克裕厥家誥尋嗣父職以愿恪稱論強學慕古由縣學
生貢入胄監一時賢士大夫多與之交故節婦賢孝聞
天下今南京吏部侍郎靜齋陳公福建叅政霞山蔡公
視學湖南時廉知其詳命郡縣覈實奏聞

詔旌其門焉 太史氏曰予昔視學湖南覽江漢之詩
而歎文王之化之遠也易家人曰利女貞女子之貞從
一而終是也然居其常者恒易而當其變者誠難節婦
處變而不失其常者也豈惟爲女子法哉有事君之責

者可以咸思矣論之尚賢好禮顯令譽於時厥亦有所本哉

近道齋呂翁傳

呂翁諱維忠字宗恕別號近道齋浙江鄞人也父欽爲沂水縣令性廉特遭讒棄官後以經學客授卒于閩翁扶柩歸葬如禮事繼母以孝稱母卒諸弟尚幼殫意撫恤竟立之始業進士有濟世之志已而家事萃身弗就歎曰命也吾聞先正有言苟弗用世必爲名醫醫獨非濟人術耶乃究心岐黃之學蘇枯解結每見奇効然苟利於物卽已人之報弗報不爲計平居蔬食羸服脩然

寒士及其奉賓祭豐家弗如嘗有所假貸後知債家力
弗能償焚削文契不復取責諸弟求分異懊歎累日至
于泣下勢不得已乃俛從之弘治甲子歲大疫仲弟維
孝夫婦患疫延被其家於是同族數十輩以疫能染人
皆畏避出次於外翁獨留不去親饋餼藥後出次者皆
病而翁及妻子數人顧卒無恙維孝夫婦死爲之經紀
其喪費皆出已貲焉正德庚辰九月五日卒年六十子
衍慶府學生有文行復慶述醫 太史氏曰昔鍾離意
爲會稽掾值歲大疫死者萬數意獨身自隱親經給醫
藥多所全濟使呂翁者得用於時推是心也豈當下鍾

離氏哉然俗謂疫能染人若有鬼祟然者乃至棄捐其親規爲自全而卒亦不免呂翁友愛爲心其正氣固足自勝而明神佑善又或爲之擁呵其間宜乎沴氣之弗能鑠也世之盲於義命巧爲避就非徒無益而適以稔釁其卓然不爲利害所動而人已兩濟者豈獨于疫厲然耶若呂翁者可以監矣

張文定公環碧堂集卷之七

張文定公環碧堂集卷之八

錄

先考封通議大夫南京吏部右侍郎洞雲存君
行錄

先公天性聰明而沉厚善晦坦而無任高而無所匿
居廣坐恭舒如一人有善亟稱之見人揚人之過即愀
然不樂不妄言笑不輕附和每羣衆嘲譁紛起而獨處
之恬如也先大父東臯公剛嚴好禮博學工詩文先公
親承家學通易詩二經及子史百家常背誦誦解如流
爲詩渾厚和平發諸天性與人未嘗立畛域而氣否優

劣胙列毫分莫可添減性然而氣仁視瘞獲程常若
有傷雖里則或待以鈞禮而於貴葬之地則賦以殮其
志周防以類遷獨長慮事無纖毫之憾其言三不若無
所執至隨義利之界屹然萬變不可搖動至生有不當
意者後其子孫皆洽舉而謂曰某吾嘗其德而護也今
若此人胡可不存厚實某吾知其險而與也今若此人
胡可不履平善指古今之變國之治亂與衰而徵
諸經書於人於天洞如也故能以義處命不膠俗習常
言數有乘除世多缺陷得喪榮辱超然不以屑意言太
身稱程明道言濟時稱韓魏公范文正公言避俗稱陶

淵明言自奉稱馬少游嘗題所居之柱曰天下爲善最樂人生無欲是高又曰遇飽即休身外黃金無用物得閑且過世間白髮不饒人人多傳誦焉垣壁門楹觸目格言如孟子尊德樂義明道德勝才實勝名質勝文李延平治亂窮通斷非人力惟當處身明道修己俟時計曾齊苟能自修天下人皆能合若但巧言令色求合則所合者可知等語率皆經傳要旨平生所深契允迪而陰陽星曆子平地理風鑑等書靡不通曉然有以馭之聊適情焉而不以志殉有殉焉者則非之曰盍求諸心風水家不曰可遇不可求風鑑家不曰有心無相相逐

心生乎邦奇始在髫髻孱羸而暴悍先公不忍加撻惟
隨事誨戒或書諸器物潛消而徐誘之故邦奇自幼別
無師授行住坐卧得以耳熟典墳以早濫科第在翰林
家書數至惟忠清公恕是訓既而邦奇上疏乞便養提
學湖南懇請就養乃允居閒或時取試卷覆閱之間有
弗及致詳者雖微必舉以戒出入必問某事當行記憶
否某文移未完無遺漏否禁戢僕隸庭戶脩然非日用
急需不許輒市歲除命隸携金出市食物市肆方冗誤
視直數倍而入焉亟召其人倍償之平生悅梁竹村先
生之博雅邦奇爲延致宦邸日以詩歌相娛有雲竹唱

和集論事必稱古論道必原天未嘗作世俗語憲僚見者欽重稱嘆殆不容口久之謂邦奇曰汝五行弗和宜姑退避正德己卯秋試畢遂奉親以歸越五載蒙

朝廷起官西蜀復曰歲行猶逆逆來而順受之庶可以免逾年果以多難辭歸每邦奇酬應文字度已就稿輒取讀之有不如意不遽言但沉吟再三以俟邦奇自悟或請問乃命易焉財以能散爲富位以早謝爲高福以不盡享爲備謂鈍爲利謂拙爲巧謂朴爲華居室悅其卑者衣食安其疏糲者器物取其陋者有所貿易給於人弗較人或失利卽不懌數日或終身不能忘嘗赤日

蚓出觸熱石宛轉騰踊不能堪亟爲移之陰處沃以清水斷棘毀甕當路徙擲之恐傷行者一草一木未嘗輕折正德庚午年五十一以邦奇秩滿封徵仕郎翰林院檢討辛巳

今天子踐阼覃恩天下加四品風憲服色嘉靖庚寅日長至

園丘禮成詔封通議大夫南京吏部右侍郎自見叔父岫雲先生登第邦奇繼之前後三十餘年受封二十有二年清約之風無改於舊聞邦奇由國學轉吏部題之楹間云卿祿喜沾雙慶日家風要似未官時蓋以示子

姓折侈明云郡屢請鄉飲僅一再至親朋請托辭謝不堪其煩署諸壁曰親友其方便我身心培養我廉耻扶持我名節一切公事幸勿相干始弱冠入縣學三試鄉闈弗偶遂絕意進取與諸父賡詠爲懽我大父早世惟大母在昏定左右侍列篝燈論古今夜深乃退率以爲常不喜飲酒遇親知雅集竟日不厭或時極懽然未嘗少縱也一切世味汨無所好惟山水之清幽竹樹之秀茂怡然樂而玩之每雨霽風和散步塋隴之間自言良苗懷新油油或或此中真樂人莫我知涼月墮庭則逍遙寂坐或踰夜分比將就寢猶睠睠若不能去晚復與鄉

間親友礪齋吳大尹先生暨其弟鈍菴傲軒二先生靜
山戴郡伯先生暨其姪野橋先生雲洲楊先生我叔父
野雲先生東軒先生爲月會會必沾醉乃罷己丑八月
六日七旬初度賓客交集夙興夜寐酬應不暇者幾再
浹旬而無倦色人方以爲壽徵明年二月八日忽中風
越數日愈而右手足舉移不能如平時矣邦奇聞之驚
竄思歸先公每以書慰諭謂飲食不減精神完固努力
事

明主無懷內顧憂今江西提學副使惟靜宗叔時官南
京見所爲詩而喜曰格律愈工可以沾遐筭也蓋吾宗

叔祖封儀制郎中葵軒公與先公莫逆故先公盛衰之
節提學君尤關情焉然邦奇以久離膝下思慕不寧辛
卯之歲圖以拜

表京師瞻

天之餘暫取便道省覲先遣家僮歸報先公喜動顏色
復書曰固吾意也二月二十四日僮還南京出門僮言
氣體康適毋以我疾爲慮至二十六日卯刻對客飲食
忽若醉寐狀左右扶護呼號弗應二十九日未刻續屬
三月十日族弟邦雍以太洲人命報計于南京邦奇哀
號殞絕痛不自勝竊惟先公崇德弗食宜享上壽而不

肖罪慝日積殃禍上延以遽至此極抱痛懷辜終天平
已矣且蓼莪我教不與焉若邦奇則於恩於義奚以
復怙罔極之痛其尚忍言乎哉

上聞賜諭祭仍命有司營塋以是年十二月十七日塋
封港利嘉岍祖營之次張氏世居鄞之槎湖自元一處
士積德累善至我先公凡十世如珠貫璧連罔所疵璣
我曾祖諱純字孟粹別號一齋仁信有文見我祖東皇
公所為傳我祖諱忱字汝誠贈通議大夫南京吏部左
侍郎正德梁氏贈太淑人先公諱時敏字日新別號洞
雲主天順戊辰享年七十有二配曰我母沈氏封涖人

家嗣曰我先兄邦彥年二十六逆其弟婦今贈淑人王氏之京病卒于開河我丘嫂林氏守節二十有七年矣次男即邦奇居京時念克禋未徵兄又乏嗣奉書請先公圖之乃納庶母董氏生邦韶邦禮邦奇同母女第二人孟安仲安皆先卒慈溪縣學生裘穆同縣徐梗妹婿也邦奇年四十有一生子子球先公命以爲兄後育于嫂氏七齡而沒繼娶陸氏封淑人生子子中子釋子胤今以子中後兄女四人邦韶娶陸氏生子子望邦禮聘李氏所著有洞雲稿若干卷痛惟先公平生之德足以平怨釋欲挽俗追古顧學成而不見知遇不獲少施於

時不肖如邦奇又弗能勉繩一二十大懼遂湮沒也以重
罪疾蹕誦之餘悉痛追錄以圖不忘而潰喪昏迷漏萬
是懼所幸病骨少蘇尚期謹思備錄以請銘於
大言君子庶潛德不泯而不孝之罪或得以少逭云

棟塘丈人錄

棟塘丈人世居四明之郡城久之曰吾以稼隱盍就諸
東徙三十里得古鄞之墟東吳小白寶幢諸澗會而西
來紆紵舒肆映帶平陸其上鹿巖聳大肅穆若屏丈人
之廬面焉又鑿渠四周而繚以垣墉澄遠朗秀超若仙
府然積劬此乃克成因于植二棟于塘曰棟苦木也吾

識吾心以示後人使味焉勿厭二棟離大門之左右墜
廡各數十武丈人課農之暇手一編對哦不置或時呼
子孫讀書其傍怡然聽之客至則琴奕觴詠惟所欲或
榜船而遊或升高而眺陶陶如也勸之仕弗應人恒遇
其棟塘游也目之曰棟塘丈人塘之上清風時來則柯
葉鏐鳴與五鄉硯之泉聲如相應和繁花蔽空香拂几
席旣其墜也與六峰嶺霞交翔川陸之間漁船樵艇往
來如織丈人於是益撫而樂之叩樹而歌歌曰坐棟東
西兮坐棟北南寒曝其陽兮燠則棲陰我思古人兮柴
桑竹林又曰遨遊棟塘兮詠歌芑豐味苦不厭兮以詒

無窮我思古人兮九膽之風以耕讀分授諸子俾業之
伯子循義業進士擢監察御史器藝政績重重播聲聞
而諸孫又嶄然穎出丈人再膺封典閭里歆艷而處之
若無歲惟鄉飲一至公室甬川子曰昔王祐植槐以期
後卒獲如志若丈人種棟以其苦淡清約詒厥子孫不
取必于顯榮而顯榮之道基焉賢於昔之人遠矣遂錄
記之丈人李姓正華名本素字云

菽田子錄

菽田子越人家櫟陽平楚之西碧流脩竹之外治田數
畝藝菽其中凡大小莖葉蒹葭蓴蓴蓴蓴之屬皆具菽田

子家貧缺雍資生而孱弱且病不任耘溉菽可以爲飯
爲糗爲餐爲酒爲殖爲醬江南之地不問駢剛赤緹埴
壚鹹瀉率以菽糞百穀之生恒資之其用廣而易生不
待厚糞不煩力治故菽田子專藝菽然其治田有法變
以水火根耜繩芟不廢其功故其菽油油然生繇繇然
茂也雨霽荷鋤相水除其蟲鼠驅其鳥雀牛羊鷄豕之
害稍暇手一編坐葦棚之陰諷誦終日興至則曳杖倘
佯而歌歌曰我菽我藝兮我田我治世路紛紜兮孰知
其歧又曰我田隣隣兮我菽施施優哉游哉兮維以卒
歲所居東爲村市足跡稀至人恒遇其菽田遊也號之

曰菽田子菽田子雖業農然聰警好古工史籀法世所傳李斯以下篆書數十家考據歷歷無遺濡毫落數紙皆逼古人蓋有以自娛超然無意於世然或時出疆輒名縉紳與之游張目論世故人情物態纏纏焉使人聽不厭然不數日輒歸菽田時甬川子退耕于野去其地甚近每相與聚首塋隴之間班荻而言稼事菽田子曰菽雖易生然藝之有道畛防必飭溝澮必深治土必熟量其廣狹時而布之勿疏勿穢視其濕燥而時節宣之任其自長去患菽者蔓者籬而舒之勿使華蕊罕而擢之勿使湮鬱故吾叔不與他農等歲穫畝數釜以其半

易粟以食田雖數指無饑者雖吾子治稼其道豈異
是哉甬川子莞爾而嘆曰推子之說可以理天下豈獨
治稼哉遂錄記之菽田子何氏偉名叙明字云

張文定公環碧堂集卷之八

張文定公環碧堂集卷之九

祭文 三十首

辭文廟文

維人生之大閑曰去就與辭受未有不敦嚴於斯而可以入堯舜之道也嘗竊揆於平生亦庶幾其不疚苟焉徒其相信而相師則所以闡揚

夫子之遺教者猶有在於既去之後也不然德義之弗崇孳孳焉較文藝而區先後也雖其明過離朱於類風乎奚救耶顧西蜀之多材實濟濟乎英秀凡其所與勗而未成圖而未究者惟

聖靈其終佑之

先賢祠安神祭文

懿帝衷之在人兮式靈承之惟慶俗靡靡其日偷者莽
狂攘而汨命硤膏肓以卽康兮天假手乎賢聖尋墜緒
於千秋兮忽抽關而啓鑰闢蒸甦使廓如兮卓示予手
規矧粲遺經若日星兮允天氓之先覺惟西梁之秀淑
兮昔斯產而斯遊藹遺風之襲人兮靈運崦而若留奉
皇猷而設教兮萃多士以歲脩曰窮養而達施兮嚮脩
途而操輶匪羣賢其曷師兮綽吾居而吾由觀堂宇之
穆穆兮列明神之幽幽及新秋之爽愷兮率諸生而薦

羞願斯夕以瞻肅竒承嘉惠而日休

先賢祠時祭文

恭惟闢發六經式訓萬世道德功言海內所宗而西蜀
諸郡則維經遊之地桑梓之鄉明神之眷顧有加而後
學之瞻承尤切茲惟仲秋謹以牲醴粢盛祗陳明薦

遺德祠文

恭惟忠誠猷畧節義文章聲名昭揭乎四方而功德尤
深於全蜀英靈儼在敬慕曷勝茲者書院告成多士雲
集謹以牲薦綏我

明神伏惟宜垂眷祐使咸迪有成不賚

皇國以克嗣前脩

祭南嶽文

巍巍明神奠茲南服毓秀儲精群生率育示將

上命視學于茲夙夜勤惕質神無疑期育真才丕闡文
教亦越四載未觀成效效克用成資神之明嘉薦綏牲
言達我誠惟神降靈懋篤忠貞植我
皇明神其永寧

大旱禱銅盆浦龍文

維茲旱魃爲虐暑氣如焚川澤已積黃塵猷畝鞠爲枯
草爰自仲夏以及初秋老幼憂惶婦子悲歎謂田稻失

敗於去歲已苦聊生之無資倘大侵復繼于今秋實懼
遭命之奄至且夫仰事俯育公賦私圖一夫之身百責
攸萃雖在豐登之日猶防匱乏之虞身矻矻以經年心
閔閔以望歲

上天何故而瘥我以旱下民何恃而弗神之
靈稟至陽之元精與大造而同體呼吸則雲雷翕聚轉
移而雨澤滂沱柰何吝三日之膏霖而不以救萬民之
生命也耶脫或刑有冤濫事有蔽虧上下陰陽之和冥
觸山川之怒則惟饕餮者之罪與肉食者之司固當溥
電照之光別珎瑜而降命不宜爲崑岡之火并玉石以

俱焚也天地以生物爲心而神靈必與之同心民黎以
百穀爲命而神靈實惟其司命敢望鑒此非常之虐哀
我至迫之情奮九淵以濟層霄召豐隆而霑甘澍猷濟
皆盜禾糝咸登改枯瘠爲充肥變悲號爲歌舞于以丕
揚神化使蒸民感悅於無窮孰與深卧重泉伴幽明藎
慎於遐邇也耶

祭國雲雲南蜀秦吳越山川林陸江湖文

事皆嘗視學於荆楚之下矣公私懇情非明神之所知
邪家食數年而奉西蜀之

命經涉險遠淹罹凶災乃至不能寧處奔馳而歸淹一

官於十年之久携兩柩於萬里之途人事苦辛一至於此非明神之所矜耶幸自發程及此屢危復安冥冥護持實荷

神賜茲惟自荆徂越路猶數千瞻望親闈歲聿其暮繼今以往終垂保佑使天時順際人事清嘉紆兩地之鬱陶集一門之康吉以副邦奇懇切祈望之情者非明神之所司邪敢以牲醴祗伸薦告

告南京城隍廟文

竒等竊祿多愆上千天罰乃四月十有四日火起號舍延燒數十楹戒懼兢惕具疏請罪于

卷之六
四一
天子既而火災屢起則率六館師生齋戒省愆莫敢違
逸廼者智仁勇等號白晝之間猶復無故起火竒等深
求內省莫知所爲洪惟我

太祖高皇帝創建太學百六十年翼勵休明之治海宇
奠安而明神亦克享常祀實太學士是賴且諸生睽離
鄉井鼓篋而來遠者數千里其茹辛服勤之狀宜蒙矜
佑於明神而回祿弗臧震驚我髦士明神寧得恕焉莫
之省耶若竒等奉職無狀獲罪下天不可復赦則寧降
災厥躬無俾無祿窮儒濫罹殃孽若或無知鬼魅盜盛
夏之氣淫用非彝明神固宜禁戢殄除俾諸生得以定

心肄業以副

明天子崇學育才之意明神亦未有依歸

辭成都府城隍廟文

邦竒不肖獲戾于神神降之罰情感事窮勢不能以不
去非敢圖自暇而荒天工也神其亮之萬里而來替年
而去存心處事亦嘗有負於昔者之盟誓乎神其鑒之
敢告

城隍廟祈晴文

禾既黃茂淫雨日降將爲民災民乃戚咨羣工咸慄迺
者荷神之惠雨則少止而陰雲緯繅烝未收竊惟湖

湘蒸黎凋困極矣征賸科歛雜出於上守土者莫如之
何勞瘁日夕思以少瘳瘡痍而民困滋甚所賴神之麻
斯民也而又不干恤其將若何守土者有不竭心神寧
降災厥躬毋濫及于百姓擇陰破霾日暄風散以登我
嘉穀以惠我黎庶使永克事神神其實休

城隍廟謝晴文

時維長夏陰雨兼旬田將汙萊臣民咸感冒攸控辭辭
于有神卜齋而淫雨息矢籲而天宇澄幽明感孚捷于
桴鼓匪某等之誠足浮天時實維明神誕憫元元降茲
休祉笙鼓俎豆謹致微衷伏惟冥垂春祐使雨暘時若

生民其未受神休

祭五祀文

當境土地 宮室 門戶 司行 司竈之神

曰惟神典司生育利庇我人凡我一門之內舉獲康寧
惟神之德今茲歲除禮宜報祀謹以牲醴庶衍我明
神

祭晉都督陶公文

恭承乏於湖湘兮肅

王命以孳孳仰廟貌以承德兮感予衷之攸思謂勤事
爲俗流兮服田功而稱聖躬稼穡之稱賢兮彼皆灼知

夫天命方運甕以自劬兮孰知其志之苦也遑嬉遊以肆誕兮與嚙盃者伍也天仁覆以好生兮人體元而勤物子獨秉此明哲兮名耿耿其不沒寧神靈之如在兮歷千秋而歆祀惟明德之靡倫兮薦澄江之芳芷

寶慶祭濂溪先生文

嗚呼天道不言而成功知道者德修而不自以爲至而况敢暴諸人手哉孟軻沒孔子之道支離決裂於管窺蠡測者之家微夫子道其或幾乎熄矣然而生長南服歆焉若無當時之人莫有能知之者是亦可謂甚晦焉矣而卒克倡明道學于天下至于今是賴是豈非誠則

必形而子思子費隱之論所以必驗而無惑者耶予獨
慨夫今之矯屈之士會莫旦夕施功而傲焉自以爲有
餘彼豈不聞夫子之風聲哉而莫知愧悔若此亦見其
識淺而氣輕甘自棄而莫之顧也邦奇不敏承乏湖南
有風教之責深懼學者務末而舍本忘內以事外以日
湮泯乎夫子之道而間又或從而倡之嗚呼安得不重
予夫子之思耶

當陽縣祭胡文定公文

嘗讀春秋而歎先生闡明道義之功也邦奇猥以庸陋
亦嘗著爲辯說以暢筆削之本意於先生蓋微有異同

而王霸義利之大閑則固惟先生之言之是宗也況夫秉道嫉邪凜凜乎爲

國之忠蓋冰蘖不足以爲堅而泰山不足以爲崇此又邦奇之所夙企而求慕竊欲以承高風而追遺蹤焉何必過先生之廟然後有以動予衷耶屬漳河之收潦瞻盛德之遺容方將使夫子之道復行于荆湖之間而未知所以振頽而發蒙徒宵晝以砭砭累歲月而奚庸願明神之默佑承嘉惠以無窮

嶽麓書院祭朱文公文

嗚呼人之於道猶魚之於水魚之去水雖生必困人之

去道雖生必辱夫子承程氏之學發六經之奧義祛千古之昏霾以惠我後人厥功偉矣方其宏撫湖南增修書院多士盡簪文風聿振今去夫子三有有餘歲而士學遂以乖離卑陋者諱言道學高明者假道以欺人譬則魚方陸困而爲川泳之勢無益祇自苦耳恭惟夫子勇智天成丕聞聖教迨及晚年猶以刊杜葉培本根爲務今也舉世而誦夫子之言亦聞存心夫子之心者耶邦奇不敏承乏湖南謬膺風教竊欲以誦前言者咸體諸身欲速成者思篤其近十有年矣以資當世而垂無窮以克慰夫子之靈而未得其術惟明神其默相之

寧鄉祭張南軒先生文

嗚呼道固形而上者也。知道者非有所爲而後爲。夫惟無所爲而爲。則其用爲有本而顯也。無間於其微。譬鬼神之無迹。乃體物而不遺。蓋道體其固然。而聖賢惟天。之是希。慨方今之貿貿。恒役志於夸毗。蓋自儒有真僞。雖賢如子夏。猶慮其或謬。而子獨超然其無疑。會天人於一體。析義利於毫釐。是豈非振古之豪傑。雖百世而猶思者邪。惟德意之孚。感靡存亡。而或遠嗟同心之難得。向明靈以陳辭。

安鄉祭范文正公文

惟公利鈍成敗付之天是非予奪授諸人董吾道而必
行志隨適而恒伸蓋未嘗謀利利及於後世未嘗計功
功昭于無窮在我者盡而天人感通固有不俟夫憧憧
然者孰與泯泯勞勞于聲利之間誤人家國以及其躬
者邪夫公私總判于毫釐而利害天淵其不同揆往事
其甚晰嗟後學之盲聾感方今而弔古將微公其孰從
率諸生而薦酒動吾徒以遺風

黃陂祭二程先生文

嗚呼孰不可威維天之命孰不可矜維人之情吾嘗觀
夫枯疾藜以入幽谷者不自知其勞且病也一日使之

逍遙乎閭風之顛以觀日月星辰之運行彼豈不快然
如復得其生邪顧徃徃舍此以就彼非其情好屯而惡
亨盖心失其道而踟躕煎熬以終其身不悟也斯不亦
重可矜邪天將拯乎斯人之質質而畀二夫子以淑靈
續千載之墜緒會妙道於遺經剪正路之秦蕪呼昧者
而使醒盖真有以承天命而覺天民其功非區區者可
得而並也今去二夫子未五百歲而茲土固二夫子之
所生儼遺容其如在煥詞旨之彰明固斯文之未晦胡
後學之易零後迷途而罔覺務口耳而遺行此固予心
之所深憂而謏陋之質亦安能有以震聾而發盲恭惟

夫子因時施教嘗自謂不當復待夫憤悱也則拳拳憫俗之心或將有以相予之未能

道州祭周元公文

嗚呼劉柔善中陰陽之會其體靜真罔有攸累去聖千載道墜於地上智挺生闡發幽秘無極之真如掌斯視自子迄今五百餘歲道孰干任利欲紛熾愚者沉淪賢者矯厲競徇目前於道日戾善而弗中子亦猶慮弗善柰何使我心晦道無形聲至隱而費體道之心謙冲恬易天何言哉煥發無旣嗟嗟淺夫乃甘暴棄羊質虎皮見草則嗜孰誠弗形徒使心愧子服下僚復自韜晦清

獻之賢加子盛氣矧其下者孰識其貴子於斯時心在
萬世浮雲過前寧以屑意誦子之言敬惟其義曷存曷
亡千載如契顧予謏陋欲奮猶躋謬膺湖湘風教之寄
適子之邦濟濟英乂啓迪無方夙夜憂畏惟道之中守
貴行利弗協于極匪予胡罪於昭明神眷茲多士默相
予衷庶幾錫類

湘陰祭蘇孝子文

噫嗟淳古旣邈悠兮慨茲民生日以偷兮物賄其依骨
肉仇兮上帝不臧爲世憂兮降生仁賢恩義周兮仁以
爲官禮爲疇兮居之弗搖耨且收兮和風浹行鄉俗修

兮胡天弗佑不憖留兮芳聲庚庚死日休兮彼殘而偷
生亦羞兮百爾君子盍相攸兮釋德與義靡善猷兮予
司風教道是謀兮先生去矣孰輓其輶兮吁嗟俛俛予
將焉求兮哀弔先生酌湘流兮侑以楚歌風南州兮

華容祭東山劉忠宣公文

邦奇蒞冠登第猶及見

先皇帝寵遇我公之日也公于時歷官垂四十年平生
敦龐靖默惟休著日恪罔求于人知

先皇帝于時臨御十有八年燭微慮遠將丕振鴻業未
裕來世識公之深亦罔出于人言每朝畢召公便殿語

至移日

帝曰朕無惑邇言旣乃心公曰

皇撫靖萬方自厥近肝膽洞照如家人父子縉紳之士
動色交慶嗚呼自薏苡猜褻韋之忠而堅僻悞厲精之
主如

先皇帝與公知遇自三代而後二千餘年乃一僅見而不
幸志未克施

先帝陟遐公亦以老去使天下臣民咨嗟痛恨至于今
嗚呼哀哉抑非

先帝不能知公之賢微公無以彰

先帝之聖進而忠誠猷略足以垂無窮退而苦節清風
足以勵頽俗於公宜無復遺憾顧天於天下啓泰亨而
弗翊其成壽平格而弗竟其用此則天下臣民所爲深
疑焉者而後進之士於聞計之餘尤不能不重爲天下
悲焉

又代祭文

蓋嘗慨夫君臣相知之難也或數百年或千餘年乃一
僅見然相知矣或不能終將終矣而又或不能久招待
也以增天下臣民之傷慨此於天意何如哉始公舉進
士讀中秘書試官郎署文行政事已大爲有識所器重

及叅外服總

朝憲澤覃民物而名彰朝著之間已而拜大司馬諒猷
贊畫罄心竭慮家累不以隨自奉若寒士然而孜孜
國政靡或少間

先皇帝察其精忠日召至便殿議天下事樞機要握罔
不咨謀蓋倚公爲腹心而公亦自肺腑有懷必陳是寧
不足以保其有終矣哉當是時天下臣民想聞風聲欣
欣望唐虞之治而

先帝遂以賓天公亦遽以老矣嗚呼是豈非天下臣民
福澤之攸係歟爲恨可勝旣哉公平生不事表襮中有

定識一切毀譽禍福恬不爲動而惟恪位著憂民物忠
國家積實輝光遂以致知於

明聖雖不獲究公之志以老而高風碩望巍然山斗優
游林下又數年而壽考以終斯亦可以無復遺憾顧其
進退死生關氣運而感人情者則固非小故也某 等
奉

命有事湖湘日訊起居忽聞薨逝豈勝哀怛謹以殺羞
牲醴遙薦于靈輶之前而哭之以辭豈獨爲公戚也哉

祭西涯李文正文

嗚呼功業文章古難兼得姚宋韓柳人有遺惜公之文

章遠追漢唐秉鈞二紀相業輝煌生而神靈毀齒騰聲
老而致政樂此昇平祿位名壽生前身後既享極隆亦
垂不朽某等咸辱公知風瞻山斗聞計孔哀將此絮酒

又

嗚呼公之名動海內久矣而吾猶恨夫知公之希也
國家開太平貞元之氣交構磅礴數十年乃發爲亨嘉
之會而公生焉神智天成不假人力自經書道術以及
乎百家衆技靡不通究文章詞翰極工且富以爲一代
宗而莫敢或尚焉者人固得而知之矣至其察始慮終
審微知著極力殫謀以陰裨乎世道公固不以言而人

亦未易以測也

先皇時時民熙物豐百司庶用率事成憲公素鈞鉅繁
事見而因閣所陳便殿所對凡以益

聖心而得治化者人未必聞其詳也及夫懷竄竊炳臺
九黃閣者觸柔老靡公于其間鎮以譽望之重感以
純氣之純左隄右防先縱後操以全士類而銷重熖者
以不諱矣而人未或窺其際也已而致政家居身不接
匪人足不踰戶闕口不談時事

廬脩然蓋廩

夫猶一或不能及乃又掩于文章功業之盛而人或不
以名言信乎知公之深者亦或希矣某也雖未敢謂知

公抑辱公之見知已非一日天下士聞公之沒雖邈不相識亦當爲之歎歔而不自禁况又受知愛者邪顧茲肅

命遐方趨奠未由敢以腥爛遙薦重幣之下而緘詞以聲予哀公尚有以知予之言乎嗚呼悲夫曩者手教間及竊見詞翰之精以謂精力未艾固大壽平格以佑我國家身雖已退而所以備諮訪叅謀議以係屬斯人之望者猶自有在方竊爲天下慶今也又安得不爲天下慟邪嗚呼悲夫

應城祭上蔡謝先生文

濟濟英俊鮮克有聞惟志弗強公迪果毅時淬時礪萬夫孰當先克勅敵次及與國禦以金湯巍巍宮室秩秩堂陛肅肅門墻昔治茲土作我人斯亦孔之將身雖逝矣遺德遺言烈烈其芳予性選悞厲于頻復欲進無方公何人也予何人也曷叅以商嘉薦清酤衍我明神曰篤不忘

襄陽祭龐德公文

公平生自食其力而風動百世坐而蠹賊其民者視公何如也薄薦溪毛食不償功

祭顧未齋閣老文

維公天挺風標嶽鍾靈秀大魁

帝丘褒然文園遭逢

明聖右文崇儒經幄敷陳

天顏載愉課書中秘兩奉

恩旨六載勤渠譽髦庶士

幸始曰才陟之台階左右匡益謀猷彌諧強梁剛克燮
友柔懷以贊中興光于九垓

大封于南留公居守煌煌

鳳書公拜稽首麟王輝耀所容赴居園卒定允維公
辰不邁微疾

帝夢弗祥

勅問興居藥餌具將竟溘而逝

帝乃震傷恤典隆渥錫謚文康

三朝寵榮七十遐壽穹秩華勲光前裕後基等接武

清朝同寅白首臨喪孔哀奠此卮酒

祭守備潘公文

逖矣朱方蘊隆磅礴公生其間魁梧卓犖貢于中禁夙
號專良出居藩輔象服孔章春盎麋城波恬鯨海嶺表
旣清荆邦樂愷

天子曰咨予懋乃庸陟爾仔肩以私爾恭奕奕鍾山滔

泊江漢王業攸基汝往其奠公履維約亦寬以慈不震
不擾軍民懷之我來覲公恢乎育臆秩秩話言溫溫容
色庶幾寅協共翊隆平胡溘而逝戚我黔烝寵澤髫年
暨于大耋七十六載日霑渥洽純嘏爾常考終清世薦
酒陳辭靈其永慰

祭少傅木齋謝公文

竒昔弱冠躡屨龍門獎我育我誨我維勤公時朝端百
辟仰止風儀嶷然見者畏喜

孝皇上賓公乃勇退邦國如空聞者憂畏燮理之績啓
沃之功剛大之節貞素之風誰則無之維公盛德在野

在朝人受其益位躋極品寵隆

四朝子姓詵詵麟趾鳳毛年登大耋高朗令終完名純
嘏誰則如公公今逝矣海內悲思老成凋喪典刑從之
奇也受知垂三十禩亦及令子誤嘗附驥奔喪南還聞
計苦廬匍匐就奠有淚沾裾

張文定公環碧堂集卷之九